



Republika e Kosovës – Republika Kosova  
Paneli Zgjedhor për Ankesa dhe Parashtrësia  
Izborni Panel za Žalbe i Predstavke

Anr.549/2021

**Paneli Zgjedhor për Ankesa dhe Parashtrësia (PZAP)**, në panelin e përbërë nga gjyqtarët: Milena Đerić, kryesuese, Faton Ademi dhe Adnan Konushevi anëtarë, duke vendosur lidhur me apelin e parashtruar nga Nehat Mustafa, kandidat për anëtar në kuvendin komunal të Komunës së Ferizajt, nga subjekti politik Iniciativa Qytetare Reformimi Demokratik për Ferizajn, paraqitur ndaj Vendimit të KQZ-së Nr.2143-2021 të datës 28.08.2021, për shkak të mos certifikimit për pjesëmarrjen në Zgjedhjet Lokale 2021, që do të mbahen me 17 Tetor 2021, në seancën e panelit të mbajtur me 31.08.2021, mori këtë:

## V E N D I M

**REFUZOHET** si i pabazuar apeli Anr.549/2021 i datës 29.08.2021, i parashtruar nga Nehat Mustafa, kandidat për anëtar në kuvendin komunal të Komunës së Ferizajt, nga subjekti politik Iniciativa Qytetare Reformimi Demokratik për Ferizajn, paraqitur ndaj Vendimit të KQZ-së Nr.2143-2021 të datës 28.08.2021 për shkak të mos certifikimit si kandidat në listën e subjektit politik Iniciativa Qytetare Reformimi Demokratik për Ferizajn, për pjesëmarrjen në Zgjedhjet Lokale 2021, që do të mbahen me datën 17 tetor 2021.

## A r s y e t i m

Me datën 29.08.2021 PZAP-i ka pranuar një apel nga Nehat Mustafa, kandidat për anëtar në kuvendin komunal të komunës së Ferizajt, nga subjekti politik Iniciativa Qytetare Reformimi Demokratik për Ferizajn në të cilin pretendon se i është bërë e padrejtë moscertifikimi i tij në bazë të vendimit të KQZ-së Nr.2143-2021 të datës 28.08.2021. Më tutje parashtruesi i apelit pretendon se arsyeja e mos certifikimit të tij qëndron në faktin se në vitin 2019 është dënuar nga Gjykata Themelore në Ferizaj me aktgjykim P.750/2019 të datës 14.11.2019 për shkak të veprës penale mos deklarim i pasurisë, e që sipas tij ai ka deklaruar pasurinë katër (4) ditë pas mbylljes së afatit të rregullt e kjo si pasojë e shkaqeve shëndetësore, për shkak të një intervenimi kirurgjik dhe se dëshminë e ndërhyrjes kirurgjike thekson se e ka prezantuar edhe në Agjensionin Kundër Korrupsionit. Me këtë aktgjykim parashtruesi i ankesës ishte i dënuar me 300 € gjobë të cilën thekson se e ka paguar dhe se pagesa e gjobës së shqiptuar nuk krijon pasoja juridike ngase në momentin e pagesës shlyhet nga evidenca e gjykatës.

Parashtruesi i apelit krahas apelit ka bashkangjitur si dëshmi vërtetimin nga Spitali Rajonal i Ferizajt, komunikimin me zyrtaren e Agjensionit Kundër Korrupsionit, njoftimin nga Zyra për certifikim dhe vendimin e KQZ me të cilin i mohohet e drejta për kandidat

PZAP-i me datën 29.08.2021 ka dërguar Komisionit Qendror të Zgjedhjeve (KQZ) kërkesën për përgjigje ne ankesë.

Zyra për Regjistrimin e Partive Politike ZRPPC-KQZ ka dërguar përgjigjen në ankesë më datën 30.08.2021, në të cilën theksohet se sa i përket kandidatit për deputet Nehat Mustafa kandidat për anëtar në kuvendin komunal të komunës së Ferizajt, nga subjekti politik iniciativa qytetare Reformimi Demokratik për Ferizajn është kërkuar nga Këshilli Gjyqësor i Kosovës që ti sigurojë KQZ-së emrat e individëve nga lista e kandidatëve të subjektit politik Reformimi Demokratik për Ferizajn të cilëve me anë të vendimit të gjykatës iu është hequr e drejta për të qenë kandidat apo që janë shpallur fajtor për vepër penale me një vendim përfundimtar të gjykatës në tri (3) vitet e fundit. Ashtu siç edhe shihet nga përgjigja në kërkesë Zyra për certifikim, nga KGJK ka pranuar informatën që z.Nehat Mustafa është i dënuar me Aktgjykim të Plotfuqishëm P.750/2019 të datës 14.11.2019. Në vazhdim të përgjigjes theksohet se Zyra i ka rekomanduar KQZ-së mos certifikimin e këtij kandidati dhe rekomandimi i zyrës është miratuar me anë të vendimit Nr.2143/2021 të datës 28.08.2021 .

Paneli, pasi që shqyrtoi dhe vlerësoj apelin, gjeti se:

#### **Apeli është i pabazuar**

Paneli, vlerësoj lejueshmërinë e apelit dhe ka ardhur në përfundim se i njëjti i plotëson kushtet e përcaktuara me nenin 122 të LZP-së dhe nenin 10 të Rregullës Nr. 02/2015- Rregullat dhe Procedurat e PZAP-it.

Pretendimet ankimore të parashtruesit të apelit se me rastin e marrjes së vendimit nga KQZ-ja, lidhur me refuzimin për certifikimin e tij nga gara e listës së kandidatëve për deputet, ju është bërë e padrejtë pasi që iu është shlyer dënimi nga evidenca e të dënuarve. Paneli vlerëson se pretendimet e parashtruesit të apelit janë të paqëndrueshme dhe të pabazuara në ligj, sepse neni 29 par.1 pika q) i LZP-së, përcakton se cilido person, emri i të cilit paraqitet në Listën e Votuesve, është i përshtatshëm për certifikim, përveç nëse personi është shpallur fajtor për vepër penale me një vendim përfundimtar të gjykatës në tri (3) vitet e fundit, siç edhe është në rastin konkret ngase parashtruesi i apelit me Aktgjykimin e plotfuqishëm P.nr 750/2019 i formës se prerë me datë 14.11.2019 me te cilin është shpallur fajtor.

Mbi këtë bazë, Paneli konstaton se KQZ-ja, me rastin e marrjes së vendimit Nr.2143-2021 të datës 28.08.2021 drejt ka zbatuar dispozitën ligjore të nenit 29 par. 1 pika q) të LZP-së, pasi që i njëjti është shpallur fajtor për vepër penale me aktgjykim përfundimtar në tri (3) vitet e fundit, sipas Aktgjykimit të plotfuqishëm P.nr750/2019 i formës se prerë me datë 14.11.2019 dhe me këtë vendim është certifikuar lista me kandidatë nga subjekti politik Reformimi Demokratik për Ferizajn e rekomanduar nga ZRPPC me të cilën i njëjti nuk është i përfshirë në listën e rekomanduar dhe çdo pretendim në apel mbi këtë bazë është i paqëndrueshëm.

Fakti se parashtruesi i apelit pretendon se dënimi i shqiptuar është shlyer nga evidenca e te dënuarve, për Panelin rrethanat e tilla nuk krijojnë mundësi për përshtatshmërinë e kandidatit bazuar ne kufizimet e përcaktuara ne nenin 29 par 1 pika q) te LZP-së, nga se kjo dispozite ka përcaktuar tri kritere, qe te jetë shpallur fajtor për vepër penale, qe te jetë dënuar ne tri vitet e fundit dhe qe vendimi

te jetë i formës se prere, për pasoj ne rastin konkret qe të tri këto kritere ligjore plotësohen dhe shlyerja nga evidenca e te dënuarve ka efekt për të drejtat qe janë humbur si pasojë e dënimit penal, ndërsa sipas LPZ-së, për tu certifikuar kandidati për deputet duhet shikuar vetëm se a plotësohen këto tri kritere ligjore nga neni 29.1. pika q) te LZP-së.

Prandaj, nga arsyet e theksuara më lart si dhe duke u bazuar në dispozitat e nenit 117 par.3, 118 par.1, 122 par.1 pika b) të LZP-së, si dhe nenit 11 par.6 të Rregullës Nr.02/15 të PZAP-it, vendosi si në dispozitiv të këtij vendimi.

Në pajtim me nenin 115.1 lidhur më nenin 118.1, 118.5 të LZP-së, është vendosur si në dispozitiv të këtij vendimi.

**Paneli Zgjedhor për Ankesa dhe Parashtresa**

Anr. 549/2021 më datën 31.08.2021.



**Këshillë Juridike:** Kundër këtij vendimi është e lejuar ankesa sipas nenit 118-par. 4 të LZP-së, në Gjykatën Supreme të Kosovës, brenda njëzetekatër (24) orëve nga momenti i marrjes-pranimit të këtij vendimi.